

O'zbekiston Respublikasi Transport vazirligi Axborot xizmatining xabar berishicha, Poytaxt jamoat transportida aholiga ko'rsatilayotgan xizmat sifatini yaxshilash, tizimda raqobat muhitini shakllantirish maqsadida «Toshshahartransxizmat» AJ yo'lovchi tashish faoliyati bilan shug'ullanuvchi xususiy korxonalar bilan hamkorlikni yo'lga qo'yishni boshladi.

Xususan, shu kunga qadar "Toshshahartransxizmat" AJ tomonidan xizmat ko'rsatib kelingan 129- "Aviasozlar shaharchasi — Yunusobod 17 mavze" yo'nalishi tenderga qadar "Alixan trans servis" mas'uliyati cheklangan jamiyatiga birlashtirildi.

Ushbu korxona tomonidan yo'nalishga Xitoyda Germaniya texnologiyasi asosida ishlab chiqarilgan "Asia star" rusumli 11 ta avtobuslar qo'yildi. Gaz yoqilg'isi bilan harakatlanuvchi mazkur transport vositasi 70 ta yo'lovchiga mo'ljallangan bo'lib, barcha qulayliklarga ega. Jumladan, konditsioner, pandus (nogironligi bo'lgan shaxslarning chiqib tushishlari uchun mo'ljallangan yo'lak), 5 ta kuzatuv kameralari, monitor, dvigatelda yong'inga qarshi ishlovchi avtomat tizim bilan jihozlangan.

Mazkur korxona faoliyati shahar yo'nalishida to'la o'rganiladi va boshqa yo'nalishlarga ham xususiy sektorni keng jalb etish choralari ko'riladi.